



Fasnacht 2001

Basler Bebbi Basel
Alti Garde

Freyschtooss im Altershaim

Mir dien mit unsere siibe Sache
uns **uf e Wääg zem Joggeli** mache.
In dr **Seniooreresidänz**
hän mir e neyi Exischtänz,
denn dert im Schtadion-Super-Bau
verputze mr unseri AaHaVau.
Mir **Alte Bebbi** wänn bewyyse:
mir gheere **nit zem alte Yyse**,
mir mache täglich uns uf d Sogge,
mir **seggle, schutte, turne, jogge**,
e jede mecht dr Beshti syy,
me rybt sich yy mit Franzbranntwyy
und maischteret jedes Mätschli logger,
mr dope ys mit Betablogger.
Mir schpiile Doppelpäss zem Loobe,
lehn d Bypäss in dr Garderoobe,
dien uf em Schpiilfäld ummepurzle,
frässe dääglic zwanzig Ginseng-Wurzle.
Dangg Ginseng simmer iberzygt,
ass under anderem d **Fitness schtygt**.

Dr Vortraab-Chef, dä macht trotz Schwitze
täglich **fufzig Liigeschitze**,
sy Frau duet lyyslig noochezelle:
lueg s goht jo, me muess numme welle.

D Oma in dr Wandelhalle
schtellt im Opa d Offsidedalle.
Dä alti Gniesser grinst und lacht,
är het im Schtroofruum Handschpiil gmacht.
Doch fir kai Gäld vo däre Wält
iberlosst sy s Mittelfäld.

Dr Unggle Karl trainiert mit Gnuss
jede Tag e Latteschuss.
Me duet ihn zem Idool erküüre,
sy graue Schtaar griegt Schtaarallüüre.
Dr Unggle Kurt, dä diggi Bolle,
dä schrubb an d Filzpantöffeli Schtolle.

D Frau Burckhardt-Merian us dr Dalbe
macht im aigene Schtroofruum d Schwalbe.
Es rennt dr alti Unggle Freddy
im Tschouga nooche und sait: het dy.
Begaischteret git d Dante Ruth
jedem Ballebueb e Schutt.
Es macht dr hageri Unggle Otti
täglich **Building** fir sy **Body**.

Dr Max, dä findets hailloos scharf,
ass är im Joggeli joggele darf.
Mit Schtolz sait är, y bi no fit,
y mecht e bitzeli Noochschpiilzyt.
Jetzt will dä schlau Haimlifais
dehaim e aigene Aaschtooss-Krais.

D Pauline - si nennt sich jetz Paola -
iebt mit em Unggle Hans d **La Ola**.
Verträumt duet si an Huggel dängge
und cool ihr kinschtig Hüftglängg schwängge.
Au s Rööslu seht me ummehusche,
s mecht mit em Kreuzer s Lybli tusche.
Noh jedem Match schtriggt s Tante Vroni
an dr Rheumadeggi vom Ceccaroni.

E alte Maa us Mincheschta
froggt: welles isch dr Hügi zwai?
Sy Frind, dä zieht en dur dr Gaggo
und sait, är syg dr Ciriaco,
sobald d Fän mit dr Hupi hiple
dät är so wie dr Kubi dribble.
Mängg junge Labbi froggt sy Babbi:
Du Babbi, isch das ägscht dr Chappi?

D Knoblauchkuur vom Unggle Franz
haltet d Gegner uf Dischtanz.
Dr Unggle Fritz, dä griegt e Schregge,
är sett schynts d Jumpfere Müller degge,
är schahrt fascht wiene Aggergaul
und macht denn grad e Nootbräms-Foul.
Dr Schiri lott nit uf sich warte
und zaigt schpontan die roti Karte.
Är sell die zruggnä, denn suscht land er
uf dr schwarze Lyschte vo de graue Panther.

Mir Residänzler sin uf Droht,
ass dauernd ebbis lauft und goht.
Hit zoobe gits e schtramm Programm,
mir schutte gege die vom **Lamm**.
Und morn am Konzärt lege mr no ain druf,
mr träte als **Joggeli-Boy-Group** uf.
Und gits zvy l Phon, so dien mir Alte
s Hörgrät aifach uf lyyslig schalte.

Vom Michael Jackson haig me gheert,
är miech s Konzärt und blyb denn dert.

De sehsch, mir Alte wänn kai Ruch,
mir sin by de Lyt und wänn ebbis due.
Mir Alte Bebbi bruuche kai Pflääg,
dr Gaischt isch **fit**, dr Kerper **zwäg**,
mir sin im Saft und voll im Schtooss,
dr Pflägedienscht wird arbetsloos.
Und will mir so **vor Fitness schtrotze**,
duet mängg jungs Gmies uns nooheglotze.
S bewunderet fascht jedi Frau
unsere **Alabaschter-Kerperbau**.
Au by dr greeschte Unterkiehlig
schpyyre mir dr dritti Friehlig.
Unser In- und Outfit isch hailloos schtark.
Bebbi, ... mir sehn ys im **Joggeli-Park**.

Falls mr mit unserer Ladäärne nit grad e baar Runde uf em
Fitness-Parcours dräijhe, kasch sy uf em Minschterplatz go be-
wundere. Wenn? Das sctoht uf de maischte andere Zeedel!